

Il luf ei puspei dentuorn

A Punteglias sin intschess dalla vischnaunca da Trun ei in luf vegnius observaus

DA HANS HUONDER / ANR

■ **Quels dis han ils purs d'animals manedels dalla part su dalla Surselva obteniu igl avis ch'in luf seigi ella vischinonza. Il guardiaselvaschina Werner Degonda ha confirmau quei enviers l'Agentura da novitads rumantscha.** L'emprema observaziun ei vegnida fatg gia ils 18 da mars 2015. Il cau dalla camona dil Club alpin svizzer da Punteglias ha saviu observar e fotografar la damaun e la sera co il luf ei sesurvius d'in animal selvadi curdau. Dus dis pli tard ha la survegionza da catscha constatau fastitgs d'in animal da rapina grond en Val Russein. Tenor *Werner Degonda* savessen els esser d'in luf, eventualmein denton d'in luf-tscherver. Pli navon ha la survegionza giu in'annunzia ils 15 d'avrel 2015 d'ina persuna che ha apparentamein observau dus lufs el territori Acla Zaniz egl ost da Danis. Ils dus lufs hagien traversau ina via d'uaul. La fin finala ha la survegionza da catscha saviu observar in luf ils 29 d'avrel 2015 danovamein ella Val Punteglias a Trun. Da quei luf dat ei schizun ina frequenza d'in film



Dapi biebein diesch onns ei il luf in hosp regular en Surselva.

MAD

da rodund ina minuta. Dil luf ch'ei vegnius observaus ella Val Punteglias exista medemamein ina empreva da DNA. Tenor quella ei igl animal da derivonza dall'Italia. Schebein el ei dil triep dil Calanda ei buca vegniu

constatau. Ils davos onns ein lufs adina puspei vegni observai en Surselva, oravontut la primavera.

Miez matg 2013 ha in luf giu scarpau pliras nuorsas a Rabius. Ellas eran en in claus. Novissima-

mein vegnan ils purs d'animals manedels orientai dil Plantahof ni era dalla survegionza da catscha via sms ni e-mail davart la preschientscha dil luf. Cheutras san els prender las mesiras necessarias.